

Här Fernand Etgen  
President vun der Deputéiertechamber  
19, um Krautmaart  
L-1728 Lëtzebuerg

Lëtzebuerg, de 6. Dezember 2019

Här President,

sou wéi d'Chambersreglement et virgesäit, bieden ech lech, dës parlamentaresch Fro un den Här Medieminister weiderzeleeden.

Et gëtt am ganze westleche Raum ëmmer méi Stëmmen, déi soen, datt d'Medie géintiwuer méi konservative Meenungen eng Zensur ausüben. A ville Länner gëtt dës Diskussioun ganz vehement geféiert.

RTL huet hei am Land eng dominant Plaz an der Medielandschaft. Ëmsou méi wichteg wär et, datt RTL sech géing drëm beméien, méiglechst objektiv ze informéieren an alle Meenungen eng Plaz ze ginn.

Elo ass awer e Lieserbréif vun enger Damm op rtl.lu net publizéiert ginn, well si op enger „Blacklist“ bei RTL stéing, an zwar mat dëser Argumentatioun:

*„Dann sin (sic!) awer dacks Saachen opgetaucht wou dir géint homosexuell Koppelen geschriwwen huet, grad, wann dës wéilte Kanner adoptéieren. Dir huet dat ganz dacks esou duergestallt, wéi wann dat en Nodeel fir d'Kanner wier An deem Sënn hutt der dann och ganz dacks Leit attackéiert, wann ët (sic!) ëm d'Ofdreiwung gaangen ass.“*

Et ass awer esou, datt d'Bestietnis fir homosexuell Koppelen, d'Adoptioun vu Kanner duerch homosexuell Koppelen, d'PMA, d'GPA, d'Wuel vum Kand, d'Ofdreiwung an d'Recht op d'Liewen alles Sujete sinn, déi a bal alle Länner vun der Welt zum Deel vehement diskutéiert ginn an iwwer déi d'Meenunge wäit ausernee ginn.

Och hei am Land sinn dëst politesch an ethesch Froen, déi ëmstridde sinn a wou d'Meenunge wäit ausernee ginn. An der Chamber an an der sougenannter „Zivilgesellschaft“ ginn iwwer esou Themen zum Deel vehement Diskussiounen geféiert.


Dës Diskussiounen schéngen also bei RTL net wëllkomm ze sinn.

Et ass an dem Zesammenhank dohier och interessant ze notéieren, datt RTL op d'mannst eng Reportage iwwer d'Leihmutterchaft fir eng homosexuell Koppel gemaach huet, ouni dobäi déi Diskussioun iwwer déi kontroverséiert Praxis mat ze berécksiichtegen.

An deem Kontext wollt ech dem Här Medieminister dës Froe stellen:

1. Ass d'Regierung der Meenung, datt RTL als dominanten audiovisuelle Medium, soll méiglechst velle Meenungen e Raum ginn an iwver all Aspekter vun eiser Gesellschaft méiglechst komplett an objektiv informéieren? Ass d'Regierung der Meenung, datt RTL och an ethesche Froe soll verschiddene Meenunge Raum ginn?
2. Gëtt et an deem Kontext vertragleche Konventiounen tëschent dem Lëtzebuenger Staat an RTL?
3. Ass d'Regierung der Meenung, datt d'Bierger hei am Land, net nëmmen an der Theorie mä och an der Praxis, prinzipiell d'Méiglechkeet sollen hunn, fir an de staatlech subventionéierten oder konventionéierte Medie Meenungen ze verrieden, déi net dem sougenannte „lénke Mainstream“ entsprechen? Wa jo, ass d'Regierung bereet, dat souwuel ëffentlech, ewéi och an de Medien ze betounen? Ass d'Regierung zu all Ament bereet, fir de Meinungspluralismus vun de Medien an an de Medien op eng glawwierdeg Manéier anzetrieden?
4. A wéi enge Medien ass d'Regierung institutionell vertrueden? Setzt sech d'Regierung an deene respektive Gremien ëmmer fir de Respekt vun enger méiglechst grousser Meinungsfräiheet an, also bewusst och fir Meenungen, déi net der Regierungslinn entsprechen?
5. Ass d'Regierung der Meenung, datt och Diskussiounen musse fräi geféiert kënnen ginn, déi den Interessien, Fuerderungen oder Meenunge vun deem engen oder aneren (dacks staark minoritären) Grupp widdersprieche, ouni dowéinst gläich enger „Diskriminatioun“ ugeklot oder verdächtigt ze ginn?
6. Misst an Zäiten, wou och an de Medie besonnesch vill iwver Transparenz a Fichiere geschwat gëtt, en national dominante Medium wéi RTL net och mam gudden Beispill virgoen an de Leit soen, wat déi sougenannte „Blacklist“ ass, wéi si sech definéiert, wien do drop steet a wat d'Modalitéite vun deem Fichier sinn? Wéini kënnst een da nees vun dem Fichier erf, z.B. , wann een d'Recht op Liewe vun den nach net gebuerene Kanner vertritt?
7. Kann d'Regierung der Chamber eng Lëscht ginn, wien vun 2013 bis haut op RTL Radio
  - eng Carte blanche huet däerfe maachen (a wéi vill mol) an desweideren:
  - wéi eng Politiker vu wéi enger Partei an de Background invitéiert goufen (a wéi vill mol);
  - wéi eng Politiker vu wéi enger Partei als Invité vun der Redaktioun invitéiert goufen (a wéi vill mol)?
8. Am Ausland gëtt et Etüden iwwert déi dacks eesäiteg a staark tendenziell Berichterstattung vun de Medie bei Froen ewéi der Migratioun, dem Klima an nach änlechen, dacks ideologiséierte Froen. Wëll d'Regierung eng Etüd maache loossen, wéi objektiv d'Press zu Lëtzebuerg vun 2015 bis haut iwwert esou Themen (an och iwwert dat speziell lëtzebuergesch Thema vum Ausländerwalrecht) informéiert huet an déi Etüd publizéieren?

Mat déiwem Respekt,



Fernand Kartheiser  
Deputéierten